

Recuors encunter la decisiun dil cussegl grond

■ (anr/hh) Ils iniziants dil scamond dalla catscha speciala ein buca surstai dalla decisiun dil cussegl grond il gliendisdis vargau d'annullar la catscha speciala. Encunter quei conclus recuoran els tier la dertgira administrativa. Quei ha il coniniziant Renatus Casutt detg enviars l'Agentura da Novitads Rumantscha. El mender cass quen-

tan ils iniziants schizun sevolvertier la dertgira federala. La proposta fatga dalla fracziun dils catschadurs el parlament cantonal beneventa il comite d'iniziativa. Quella proposta havessidenton stuiu vegnir suttamessa al suveran sco cunterproposta all'iniziativa.

Catscha speciala daventa cass da dertgira

L'iniziativa encunter la catscha speciala va en ina proxima runda

DA HANS HUONDER / ANR

■ **Il gliendisdis ha il cussegl grond decidu cun 79 encunter 36 vuschs d'annular l'iniziativa encunter la catscha speciala. Encunter quei conclus recuoran ils iniziants tier la dertgira administrativa dil cantun Grischun.** La discussiun el parlament cantunal davart l'iniziativa ei stada fetg animada ed intensiva. Ella ha denton era mussau ch'igl ei buca clar schebein l'iniziativa cunterfa al dreg ni buca. Ils pareris dalla regenza vegnan alla conclusiun che l'iniziativa cunterfetschi alla lescha d'ual e dalla catscha. Il cunterpareri dils iniziants vegn ad in'otra conclusiun, numnadamein ch'il dreg vegni buca tanguaus. Ils votums el cussegl grond han allura mussau ch'ei regia confusiun. Quella confusiun vulan ils iniziants ussa laschar sclarir. «Nus vegnin buca ad acceptar quella decisiun dil cussegl grond. La dertgira administrativa duei decider schebein nosa in-

iziativa ei valeivla ni buca», di il coniniziant *Renatus Casutt* da Falera ch'ei sesius sez duont entgins onns el parlament cantunal.

D'accord cun la proposta

El rom dalla discussiun il gliendisdis suentermiezdi el cussegl grond ha la fracziun dils catschadurs annunziiau ina proposta, aschidadir ina soluziun da cumpromiss. Quella dueigi vegnir inoltrada sche l'iniziativa vegni annullada, quei ch'ei pia uss il cass. Cun quella proposta vul la fracziun dils catschadurs buca negligir cumpleinamein las intenziuns dils iniziants. La proposta preveda ina catsch'aula il settember cun maximum 21 dis e cun ina interrupziun da maximum treis dis in suenter l'auter. Plinavon quater ulteriurs dis da catsch'aula ella secunda mesadad digl october. Per ils iniziants ei quella proposta ina via pusseivla. «Nus mein d'accord cun quella proposta. Ella va da principi en nosa direzziun. Il meglier fuss denton stau

sche quella proposta fuss vegnida presentada sco cunterproposta tier nosa iniziativa. Lu havess il pievel saviu decider davart las duas variantas», di *Renatus Casutt*. Essend che la proposta vegni inoltrada uss alla regenza e quei suenter che l'iniziativa seigi annullada, seigien els – ils iniziants – buca perschua di che quella vegni la fin finala era realisada. «Differentas propostas per migliurar la situaziun dalla catscha ein gia vegnidas discutadas, mo neginas realisadas. Nus fidein semplamein buca pli», accentuescha *Renatus Casutt*. El cusseggia allas autoritads cantunales da tractar e sche pusseivel metter en vigur aschi spert sco pusseivel quella varianta, cass cuntrari preni quella historia cun catscha speciala negina fin: «Sch'ei fa da basegns mein nus entochen avon dertgira federala.»

Leds dalla decisiun

Il president dall'Uniun cantunala dils catschadurs da patenta dil Grischun,

Robert Brunold da Sursaissa, ei leds dalla decisiun ch'il parlament cantunal ha priu il gliendisdis suentermiezdi: «Jeu havevel buca quintau ch'il resultat seigi la fin finala aschi clars. Quei spargna a nus in grond cumbat da votaziun.»

La proposta ch'ei vegnida dalla fracziun dils catschadurs el cussegl grond ei per *Robert Brunold* ina via pusseivla pigl avegnir: «Nus stuein secapescha aunc discutir davart quella e surtut era consultar nosa basa.

Senza quella proposta havess l'iniziativa probablamein giu pli sempel el cussegl grond. Era la proposta ei secapescha ina damonda politica.» Tenor *Robert Brunold* eis ei impurtont che la catscha speciala resti: «En cass ch'ina eventuala catsch'aula duront quater dis ella secunda mesadad digl october ha success se reducescha il cuoz dalla catscha speciala.»



Igl iniziante *Renatus Casutt* ei buca surstaus dalla decisiun dil cussegl grond. Aschia ha la historia ina continuaziun.

FOTO N. SIMMEN



Robert Brunold, president dall'Uniun cantunala dils catschadurs da patenta, ei leds dalla decisiun dil parlament cantunal.

FOTO H. HUONDER